

Meeqqanut, Naligiissitaanermut, Akuliutitaanermut Isumaginninnermullu
Ministereqarfik
Ilaqutariit Inatsiseqartitaanerat pillugu Allaffeqarfik
J.nr. 2012-5209 / 1th
16. december 2014

MISSINGIUT

Angajoqqaat akisussaanerannik inatsisip Kalaallit Nunaannut atuutilersinnera pillugu peqqussutip eqikkarnera

1. Aallaqqaasiut

Namminersorlutik Oqartussat qinnutigisaattut Kalaallit Nunaanni ilaqutariinnut inatsiseqartitsinermik naleqqussaasoqarneranut atatillugu angajoqqaat akisussaanerat pillugu inatsit Kalaallit Nunaannut atuutilersinneqarpoq.

Taamaattumik angajoqqaat akisussaanerat pillugu inatsit Kalaallit Nunaannut atuutilersinneqarnissaa pillugu peqqussutissatut missingersuusiortoqarpoq. Peqqussummut missingiutikkut angajoqqaat akisussaanerat pillugu inatsit Kalaallit Nunaannut atuutilersinneqarpoq, inatsisini ukunani allannguisoqarnerata malitsigisaanik allannguuteqartoq:

- Meeqqat pilersorneqarnerat pillugu inatsisip, aappariinnerup inatsisitigut sunniutai pillugit inatsisip, aappariilersarneq aappariigunnaartarnerlu pillugit inatsisip aamma angajoqqaat akisussaanerat pillugu inatsisip allanngortinnera pillugu inatsit nr. 349, 6. maj 2009-meersoq (Aningaasatigut paasissutissanut qaraasiakkut pissarsisinnaaneq, naammagittaalliuuteqarnissamut piffissaq il.il.)
- Qitornavissartaartarnermut inatsisip aamma inatsisit allat assigiinngitsut allanngortinneqarneri pillugit inatsit nr. 494, 12. juni 2009-meersoq (Akuersinertaqanngitsumik qitornavissartaarneq, nalunaarsukkamik inooqatigiit meeraannik inunngorneraniit qitornassamik qitornavissartaarneq il.il.)
- Angajoqqaat akisussaanerannik inatsisip, eqqartuussisarnermik inatsisip aamma Qitiusumik Inuit Nalunaarsuiffiat pillugu inatsisip allanngortinnera pillugu inatsit nr. 600, 18. juni 2012-meersoq (Angajoqqaat akisussaanerannik inatsimmik nalilersuinerup malitsigisaanik allannguinerit).

Inatsisit taakku Kalaallit Nunaannut atuutilersinneqarput kalaallit nunaanni pissutsinut naapertuuttunik allannguuteqartillugit.

Inatsisit allanngortinneqartut uku Kalaallit Nunaannut maannakkut atuutilersinneqanngillat, pingaartumik maannakkut Kalaallit Nunaannut atuutilersinneqanngitsunik inatsisinik imaqarmata, imaluunniit Kalaallit Nunaannut attuumassuteqanngitsunik inatsisinik imaqarmata:

- Isumaginninnermi kiffartuussineq pillugu inatsisip, inatsisikkut isumannaatsuuneq pillugu inatsisip aamma isumaginninnermut tunngasuni aqutsineq kiisalu angajoqqaat

akisussaanerannut inatsisip allanngortinneqarneri pillugit inatsit nr. 628, 11. juni 2010-meersaq (Meeraq pillugu iluarsartuussineq).

- Meeqqanut inatsisip, qitornavissiarneq pillugu inatsisip, eqqartuussisarnermik inatsisip aamma inatsisip allanngitsunik allanngineq pillugu inatsit nr. 652, 12. juni 2013-meersaq (Anaanaassuseqataaneq il.il.).
 - Pisortat oqartussaasuinut qinnuteqaatit, nalunaarutiginninnerit, nalunaarutit, kissaateqarnerit uppersaataillu pillugit inatsisip aalajanagerakkat assigiinngitsut allanngiutaat pillugit inatsit nr. 552, 2. juni 2014-meersaq (sanaartornissamik akuerineqarnissaq pillugu qinnuteqaatinut, angajoqqaatut oqartussaassuseqalernissaq pillugu qinnuteqaatinut, meeqqap najugaa, meeqqamik najorteqarsinnaaneq il.il. qinnuteqaatinut, averusernissamik avinnissamillu qinnuteqaatinut, meeqqanut aappaasumullu akilersuutit pillugit qinnuteqaatinut, najugallit aallarniutitut akiliutissaannut taarsigassarsinissamik qinnuteqaatinut, biilit uninngaartarfiannitsitsinissamut akuersissutit pillugit qinnuteqaatinut aamma Inunnik Qitiusumik Nalunaarsuiffik il.il. pillugit inatsit malillugu uppersaalluni atsiortarnerit pillugit kissaateqarnertarnermut tunngatillugu qarasaasiakkut pinngitsoorani imminut sullitalernissamut ikaarsaariarneq).

Angajoqqaat akisussaanerannut inatsisip atuutilersinneratigut meeqqamik illersuineq pillugu Haagimi isumaqatigiissut pillugu inatsit nr. 434, 8. maj 2006-meersaq aamma angajoqqaatut oqartussaassuseqarnermik aalajangiisarnernik nunani tamalaani akuersisarneq naammassinnittarnerlu pillugit inatsit, inatsimmik nalunaarut nr. 375, 6. april 2010-meersaq naapertorlugu, tassungalugu atasut isumaqatigiissutit Kalaallit Nunaannut atuutilersinneqarput, immikkut peqqussutinik eqqikkaanerit naapertorlugit.

Aammattaaq angajoqqaatut oqartussaassuseqarneq aamma meeqqamik najorteqarneq pillugu Kalaallit Nunaannut maleruagassat nammineersinnaassuseqannnginneq aamma sernissuisussaataaneq pillugu inatsimmi (namminersorsinnaanermik inatsit) peqqussut nr. 306, 14. maj 1993-meersukku Kalaallit Nunaannut atuutilersinneqartumi aalajangersakkat atorunnaarsinneqarput (matuma kingorna namminersorsinnaanermik peqqussut), peqatigisaanilu aappariilersarneq aappariigunnaartarnerlu pillugit inatsimmi (peqquussut nr. 307, 14. maj 1993-ikkut Kalaallit Nunaannut atuutilersinneqartumi, averusernermi avivinnermilu angajoqqaatut oqartussaassuseqarnermut pinngitsoorani isummertarnissaq pillugu aalajangersakkat atorunnaarsinneqarput. Kalaallit Nunaanni ilaqutariit inatsiseqartitaaneranni inatsisip assigiinngitsut allanngortinnissaannik inatsisissutut siunnersuut innersuussutigineqarpoq (matuma kingorna Inatsisissatut siunnersuut) (angajoqqaatut akisussaassuseqarneq pillugu inatsisip aamma inuit marluk suaassuseqatigiit aappariilertarnerannik inatsisip Kalaallit Nunaanni atuutilersinneqarnerisa kingunerisaanik allannguutit).

2. Inatsisip atuuttut

Angajoqqaatut oqartussaassuseqarneq aamma meeqqamik najorteqarneq pillugu maleruagassat Kalaallit Nunaannut atuuttut oqartussaassuseqarnermik inatsimmi kapitali 2-mi nassaarineqarsinnaapput.

2.1. Angajoqqaatut oqartussaassuseqarneq

Peqqussutip malitsigisaanik meeqqap angajoqqaavi ataatsimoorlutik angajoqqaatut oqartussaassuseqarput, meeqqap inunngornerani katissigimaganik imaluunniit kingusinnerusukku

aappariilersimagunik. Meeqqap inunngornerani angajoqqaat averusersimappata anaanaasoq kisimiilluni angajoqqaatut oqartussaassuseqarpoq, aappariit inooqatigeeqqilersimangippata. Angajoqqaat katissimangippata anaanaasoq kisimiilluni angajoqqaatut oqartussaassuseqarpoq. Angajoqqaat, imminnut katissimangitsut, imaluunniit averusersimasut, eqqartuussisup akuersineratigut isumaqatigiissinnaapput ataatsimoorlutik angajoqqaatut oqartussaassuseqalerniarlutik.

Angajoqqaat ataatsimoorlutik angajoqqaatut oqartussaassuseqartut inooqatigiinngippata, imaluunniit taakku arlaata inooqatigiinneq atorunnaarsikkusuppagu, taakku arlaata piumasarisinnaavaa ataatsimoorluni angajoqqaatut oqartussaassuseqarneq atorunnaarsinneqassasoq. Angajoqqaat eqqartuussiviup akuersineratigut isumaqatigiissinnaapput taakkunani arlaat kina angajoqqaatut kisimiilluni oqartussaassuseqassanersoq. Angajoqqaat isumaqatigiinngippata, imaluunniit isumaqatigiissutertik akueriumangippassuk, meeqqamut suna iluaqutaanerunersoq immikkut eqqarsaatigalugu angajoqqaat arlaat kina kisimiillu angajoqqaatut oqartussaassuseqassanersoq eqqartuussivimmit aalajangerneqassaaq.

Averusernermi imaluunniit avivinnermi angajoqqaatut kina oqartussaassuseqassanersoq isummerfigineqassaaq. Angajoqqaat Naalagaaffiup Sinnisuata imaluunniit eqqartuussiviup akuersineratigut isumaqatigiissuteqarsinnaapput ataatsimoorlutik angajoqqaatut oqartussaassuseqarneq ingerlatiinnarniarlugu, imaluunniit taakku arlaat ataaseq kisimiilluni angajoqqaatut oqartussaassuseqassasoq. Angajoqqaat isumaqatigiinngippata, imaluunniit isumaqatigiissutertik akueriumangippassuk, meeqqamut iluaqutaanerusussaq eqqarsaatigalugu angajoqqaat arlaat kina kisimiillu angajoqqaatut oqartussaassuseqassanersoq eqqartuussivimmit aalajangerneqassaaq.

Angajoqqaatut oqartussaassuseqarneq eqqartuussisup akuersineratigut angajoqqaamut, angajoqqaatut oqartussaassuseqanngitsumut, imaluunniit allanut nuussinnaavaa. Isumaqatigiissut akuerineqassaaq, meeqqamut iluaqutaanerusussaq eqqarsaatigalugu tamanna akerliunngippat.

Angajoqqaat katissimangitsut ataatsimoorlutik angajoqqaatut oqartussaassuseqanngippata angajoqqaatut oqartussaassuseqarneq anaanaasumiit ataataasumut taamaallaat eqqartuussiviup nuussinnaavaa. Aalajangiinnermi manna tikillugu ataataasup meeqqamut atassuteqarnera eqqarsaatigineqassaaq.

Angajoqqaat ataatsimoorlutik angajoqqaatut oqartussaassuseqarpat, aappaalu toquppat, angajoqqaatut oqartussaassuseqarneq angajoqqaap aappaaniiginnassaaq. Toqusoqarnerani meeraq suli inuusumi najugaqanngippat toqusoqarneranut atatillugu allap angajoqqaatut oqartussaassuseqarnissaq qinnutigisinnaavaa. Qinnuteqaat taamaallat akuerineqarsinnaavoq meeqqamut pitsaanerpaasumut eqqarsaatiginninneq angajoqqaatut oqartussaassuseqarneq angajoqqaap aappaaniiginnarnissanut akerliuppat. Angajoqqaat arlaat kisimiillu angajoqqaatut oqartussaassuseqarpat, taannalu toquppat, imaluunniit allatigut toqusoqarneranik kinguneqarluni arlaannaalluunniit angajoqqaatut oqartussaassuseqarnani, meeqqamut iluaqutaanerusussaq eqqarsaatigalugu kina angajoqqaatut oqartussaassuseqassanersoq aalajangiisoqassaaq. Angajoqqaat aappaat angajoqqaatut oqartussaassuseqarnissaq qinnutigippagu qinnutigineqartoq akuerineqassaaq, meeqqamut iluaqutaanerusussaq tamatumunnga akerliunngippat. Tamanna pillugu aalajangiinerit eqqartuussivimmit aalajangerneqassapput.

2.2. Meeqqamik najorteqarneq

Meeqqap angajoqqaanut marlunnut atassuteqarnera allanngortinnginniarneqassaaq angajoqqaap angajoqqaatut oqartussaassuseqanngitsup meeqqamik najorteqarnissamut pisinnaatitaaffeqarneratigut. Meeqqamik najorteqarneq pillugu aalajangiinerit eqqartuussivimmit aalajangerneqassapput, meeqqamik najorteqarnerup aalajangersarnissaanut itigartitsisinnaasoq imaluunniit meeqqamik najorteqarneq pillugu aalajangiineq isumaqatigiissuteqarnerluunniit atorunnaarsinnaallugu, meeqqamut pitsaanerpaassamut eqqarsaatiginnineq tapertaappat. Aalajangiinermi pingaartumik meeqqamut manna tikillugu angajoqqaap najorneqartup atassuteqarnera eqqarsaatigineqassaaq.

2.3. Meeqqamik tusarniaaneq

Meeraq aqqaneq marlunnik ukioqalersimappat, angajoqqaatut oqartussaassuseqarneq imaluunniit meeqqamik najorteqarneq pillugu suliami aalajangiisooqartinnagu aallaqqaammut meeqqamik oqaloqatiginnittoqassaaq.

2.4. Angajoqqaatut oqartussaassuseq aamma meeqqamik najorteqarneq pillugu sulianik eqqartuussisup suliarinninnera

Angajoqqaatut oqartussaassuseqarneq aamma meeqqamik najorteqarneq pillugu eqqartuussisup aalajangiineri tunngaviatigut eqqartuussutikkut aalajangiiffigineqassapput, Kalaallit Nunaannut eqqartuussisarnermik inatsit malillugu Nunatta eqqartuussivianut suliareqqitassanngortinneqarsinnaasut. Angajoqqaatut oqartussaassuseqarneq pillugu isumaqatigiissutit akuerineqarnissaa pillugu aalajangiigallannerit aamma itigartitsinerit eqqartuussutikkut aalajangiiffigineqassanngillat, taamatulli aalajangiinerit nunatta eqqartuussisuanut suliassanngortinneqarsinnaallutik.

2.5. Sulinissaq pillugu isumaqatigiissutit

Anajoqqaatut oqartussaassuseqartup meeqqap soqutigisai pisariaqartitaalu aallaavigalugit meeqqap inuttut atugai pillugit aalajangiisinnaanera meeqqap nammineq sulinissaq pillugu isumaqatigiissuteqarsinnaaneranut tamakkiisumik atuutinngilaq.

Inersimasuunngitsoq, aappariilersimasoq, taamaalilluni sulinissaq pillugu isumaqatigiissummik isumaqatigiissuteqarnissamik atorunnaarsitsinissamullu nammineq aalajangiisinnaavoq. Inersimasuunngitsoq angajoqqaatut oqartussaassuseqartumiit akuerineqarsimasoq nammineq suliffissarsisimappat, taamaalilluni imminut nammineq pilersorsinnaalerluni, inersimasuunngitsoq, 15-nik ukioqartoq, isumaqatigiissut naammineq aallaaviatigut atorunnaarsinnaavaa assingusumilu sulilersinnaalluni.

Inersimasuunngitsup nammineerluni isumaqatigiissutigisimasaa sulinissaq pillugu isumaqatigiissut angajoqqaatut oqartussaassuseqartumit atorunnaarsinneqarsinnaavoq, inersimasuunngitsup perorsarnerata eqqarsaatigineqarnera imaluunniit atugarissaarnerata tamanna pisariaqartippagu.

Kiisalu namminersorsinnaanermut peqqussummi sulinissaq pillugu isumaqatigiissutit pillugit maleruagassat atuutinngillat, ilinniartuunermut tunngasut pillugit immikkut maleruagassani allanik malitseqanngippata.

2.6. Angajoqqaatut oqartussaassuseqarneq aamma meeqqamik najorteqarneq pillugu nunani tamalaani isumaqatigiissutit

Peqqussut malillugu Danmarkimi naalackersuisut angajoqqaatut oqartussaassuseqarneq aamma meeqqamik najorteqarneq pillugu danskit aamma nunani allani eqqartuussiviit maleruagassaasa akornanni pissutsit pillugit naalagaaffinnik allanik isumaqatigiissuteqarsinnaapput. Isumaqatigiissut Lovtidendemi nalunaarut malillugu Kalaallit Nunaanni atorneqarsinnaavoq. Aammattaq isumaginninnermut, meeqqanut aamma akuliutitaanermut ministeri angajoqqaatut oqartussaassuseqarneq aamma meeqqamik najorteqarneq pillugu danskit aamma nunani avannarlerni maleruagassat akornanni pissutsit pillugit maleruagassanik aalajangersaasinnaavoq.

3. Angajoqqaat akisussaanerannik inatsisip atuutilersinnera pillugu peqqussummut missingiut

Kalaallit Nunaanni angajoqqaat akisussaaneq pillugu inatsisip atuutilersinnerani inatsit Kalaallit Nunaanni pissutsinut ataasiakkaatigut naleqqussarneqarpoq. Tassani pingaartumik uku pineqarput:

- Aaqqissuussineq atuuttoq, taanna malillugu angajoqqaatut oqartussaassuseqarneq aamma meeqqamik najorteqarneq pillugu isumaqatigiinngissutini Kalaallit Nunaanni eqqartuussiviit aalajangiisarneri, allanngortinneqanngilaq. Kalaallit Nunaanni eqqartuussisarnermik inatsimmi § 55-mut innersuussisoqarpoq, taanna malillugu suliani taakkunani eqqartuussivik oqartussaasoqarfinni siulliulluni. Aaqqissuussinerli annertusineqarpoq, taamaalilluni eqqartuussiviit piginnaatitaaffiat aamma meeqqap najugaqarfia, allamut atassuteqarneq aamma nunanut allanut angalanermut akuersineq pillugu suliat ilanngunneqarlutik. Peqatigisaanik angajoqqaatut oqartussaassuseqarneq pillugu isumaqatigiissutit pillugit sulianik Naalagaaffiup Sinniisaata suliarinnissinnaaneranut piginnaatitaaneranut isumaqatigiissutini pissutsit tamarmik ilaalerlutik, tassunga ilanngullugu aamma angajoqqaatut oqartussaassuseqarnerup inummumut allamut nuunneqarnera. Aammattaq ilisimatitsinissamut pisinnaatitaaffimmik arsaarinninneq pillugu suliani Naalagaaffiup Sinniisaa aalajangiinissamut piginnaatitaalerpoq. Taamatut Kalaallit Nunaanni eqqartuussiviit aamma Naalagaaffiup Sinniisuata akornanni piginnaatitaanernik agguaanerup kingunerisaanik angajoqqaatut akisussaaneq pillugu suliat tamarmik allaffeqarfikkut oqartussani – naalagaaffimmi ingerlatsivimmi – aallartinneqartarnissaat pillugu angajoqqaat akisussaanerannut inatsimmi aalajangersakkat Kalaallit Nunaannut atuutilersinneqanngillat.
- Meeqqamut ataataassutsip akuerineqarneranut atatillugu ”isumassuinissamut akisussaanermillu nalunaarutikkut” ataatsimoorluni angajoqqaatut oqartussaassuseqarnissap isumaqatigiissutigineqarsinnaanera periarfissaq maannakkuugallartuq atuutilersinneqarsinnaanngilaq, tassa nalunaarut meeqqanut inatsit malillugu ataataassutsimik nalunaarsuinnermut atatillugu atorneqartarmat (inatsimmik nalunaarut nr. 1047, 8. november 2012-meersoq kingusinnerusukkut allannguutilik), maanna sulii Kalaallit Nunaannut atuutilersinneqanngitsoq.
- Eqqartuussiviit aamma Naalagaaffiup Sinniisua meeqqanik paasisimasalimmik imaluunniit akerleriittunik isumaqatigiissitsiniaasumik neqerooruteqarnissamut periarfissaqassapput – kisiannili pisussaaffiginagu. Tamatumunnga pissutaavoq inuiaqatigiit kalaallit neqeroorutit pinngitsuugassanngitsunnngortinnissaanut piginnaasanik pisariaqartunik peqannginnerat. Tamanna aamma pissutigalugu angajoqqaap, meeqqap najugaqarfigisaa, meeqqamik najorteqarneq pillugu angajoqqaap aappaata aggersarnissaa pillugu naalagaaffimmi ingerlatsivimmut qinnuteqarsinnaanera, aamma angajoqqaatut oqartussaassuseqarneq,

meeqqap najugaa imaluunniit meeqqamik najorteqarnissaq pillugu ataatsimiinnissamut angajoqqaat aggersarneqarnissaat pillugu meeqqap naalagaaffimmi ingerlatsivimmumt qinnuteqarsinnaanera pillugu maleruagassat atuutilersinneqanngillat.

- Meeqqap qitornavissianngortinneqarsimasup aamma meeqqap qaniginerpaavisa akornanni najorteqarneq imaluunniit allatigut atassuteqarneq pillugu angajoqqaat akisussaanerannik inatsimmi § 20 a-mi aalajangersagaq Kalaallit Nunaanni Naalakkersuisut kissaateqarnerisigut Kalaallit Nunaanni meeravissiaartaarnermi immikkut ileqqunut naleqqussarneqassaaq. Kalaallit Nunaanni Naalagaaffiup Sinniisaa tassunga atatillugu ilisimatitsivoq Kalaallit Nunaanni ilaqutariinni qitornavissiaartaarnerit Danmarkimi ilaqutariinni qitornavissiaartaarnerniit allaanerusut, tassa Kalaallit Nunaanni ileqqummat meeqqat inoorlaat ilaqutariit iluanni aappariinnut nammineq meerartaarsinnaanngitsunut tunniunneqartarneri. Meeqqat taakku, aappariit meeraqanngitsunit qitornavissiarineqartut, taaneqartarput "meeqqat tunissutit". Taamatut "meeqqanik tunissutinik qitornavissiaartaarneq" tassaavoq qitornavissiaartaarnerit "ammasut", meeraq alliaartornermini aamma angajoqqaavimminut taakkulu qanigisaannut aamma atassuteqartarluni, tassunga aamma ilanngullugit angajoqqaaviit meerarisinnaasaat allat. § 20 a-p atuutilersinneratigut aalajangersagaq nutaaq ilanngunneqarpoq, tamatuma kingorna qanigisani meeravissiaartaarnermi imaluunniit meeravissiaartaartup aamma meeqqap imaluunniit taassuma angajoqqaavisa akornanni immikkut attuumassuteqartuni (ilaqutariit qitornavissiaartaarnerannik taaneqartartuni) meeqqap aallaqqaammumt qanigisaaniit noqqaassuteqartoqarneratigut immikkut pisuni meeqqamik najorteqarneq allatigulluunniit atassuteqarnissaq aalajangersarneqarsinnaalluni (assersuutigalugu oqarasuaatikkuq oqaloqateqartarneq, allaqatigiittarneq il.il.).

3.1. Angajoqqaatut oqartussaassuseq meeqqamullu iluaqutaanerusussaq

Meeqqat inuusuttullu 18-it inorlugit ukiullit angajoqqaanik oqartussaaffigineqarput, taakku aappariilersimanngippata.

Angajoqqaatut oqartussaassuseqartoq meeqqamik isumassuissaaq aamma meeqqap soqutigisai pisariaqartitaalu aallaavigalugit meeqqap inuttut atugai pillugit aalajangiissalluni. Meeraq isumassorneqarnissamut toqqissisimanissamullu pisinnaatitaaffeqarpoq. Tamanna inuttaa ataqqillugu pissaaq aamma timaatigut pillaasoqartussaananik allatigulluunniit innarliisoqartussaananik. Taamaalilluni Kalaallit Nunaanni angajoqqaat meeqqaminnik timaatigut pillaasarnernik sunilluunniit atuisinnaanerat atorunnaarsinneqarpoq, soorlu tamanna Danmarkimi inatsit nr. 416, 10. juni 1997-ikkut pisoq. Tamatuma kingorna angajoqqaat meeqqaminnut timaatigut pillaasinnaanngillat, tamanna Kalaallit Nunaanni pinerluttulerinermi inatsit malillugu pineqaatissiinermik kinguneqartinneqarsinnaalluni. Taamaalilluni inatsimmi § 88, oqaaseqatigiinni siullerni atuarneqarsinnaavoq, nakuusenermut eqqartuunneqassaaq piaraluni inuup allap timaanik innarliisoq imaluunniit ajoqusiisoq.

Angajoqqaat ataatsimoorlutik angajoqqaatut oqartussaassuseqarpata meeqqap atugaanut tunngatillugu aalajangiinnerit pingaaruteqartut angajoqqaat akornanni isumaqatigiissutiginnissat pisariaqarpoq. Angajoqqaarli meeqqaminik najugaqartitsisoq meeqqap ulluinnarni inuunerani pingaarnertigut atugai pillugit aalajangiissinnaavoq, tassunga ilanngullugu nunami sumi najugaqassanersoq.

Angajoqqaat ataatsimoorlutik angajoqqaatut oqartussaassuseqarpata, angajoqqaatut oqartussaassuseqarneq pillugu isumaqatigiinnngippata, meeqqap Danmarkimi imaluunniit Savalimmiuni isumaqatigiissutaasoq qaangerlugu sivitsorlugu nunamik qimatsinissaanut marluullutik akuersissapput, tassunga ilanngullugu Danmarkimut imaluunniit Savalimmiunut aallarnek, imaluunniit meeqqap nunami allamiinissaa, meeqqap najugaa imaluunniit nunanut allanut angalanissaanut akuersineq pillugu aalajangiisoqarsimannngippat.

Peqqussut malillugu aalajangiinerit meeqqamut iluqutaanerususaaq aallaavigalugu aalajangerneqassapput, aamma meeqqamut tunngatillugu pissutsini tamani ukiui perorsimassusialu apeqqutaatillugu meeqqap nammineq isumaa eqqarsaatigineqassalluni.

3.2. Angajoqqaatut oqartussaassuseqartut

Meeqqap inunngornerani angajoqqaat katissimappata, imaluunniit kingusinnerusukkut aappariilersimappata, ataatsimoorlutik angajoqqaatut oqartussaassuseqarput. Meeqqap inunngornerani angajoqqaat averusersimappata anaanaasoq kisimiilluni angajoqqaatut oqartussaassuseqarpoq, angut averusersimasooq akuersisoqarneratigut imaluunniit eqqartuussutikkut meeqqap ataataatut isigineqannngippat. Meeqqap inunngornissaa sioqqullugu qaammatini kingullerni qulini angajoqqaat katissimappata ataatsimoorlutik angajoqqaatut oqartussaassuseqarput.

Angajoqqaat katissimannngippata, anaanaasoq kisimiillu angajoqqaatut oqartussaassuseqarpoq, ataatsimoorlutik angajoqqaatut oqartussaassuseqarneq pillugu isumaqatigiissuteqarsimannngippata, *tak. matuma kingulii*. Aammattaaq angut akuersineq imaluunniit eqqartuussut malillugu meeqqamut ataataasutut isigineqarpat, meeqqap inunngornissaa sioqqullugu qaammatini kingullerni qulini angajoqqaat ataatsimoorlutik inuit allattorsimaffiani nalunaarsorneqarsimasumik najugaqarpata imaluunniit najugaqarsimappata angajoqqaat ingerlaannartumik ataatsimoorlutik angajoqqaatut oqartussaassuseqarput.

Ataatsimoorluni angajoqqaatut oqartussaassuseqarneq ingerlaannassaaq, angajoqqaat inooqatiginnertik atorunnaarsikkaluarpassuk imaluunniit averuserpata imaluunniit avivippata.

Angajoqqaat isumaqatigiissuteqarsinnaapput ataatsimoorlutik angajoqqaatut oqartussaassuseqassallutik, angajoqqaallu ataatsimoorlutik angajoqqaatut oqartussaassuseqartut, inooqatigiinnngitsulli, isumaqatigiissinnaapput arlartik ataaseq kisimiilluni angajoqqaatut oqartussaassuseqassasoq. Kiisalu angajoqqaat isumaqatigiissuteqarsinnaallutik angajoqqaatut oqartussaassuseq angajoqqaap aappaaniit allamut nuunneqassasoq. Taamatut isumaqatigiissutit atuutissappata Naalagaaffiup Sinniisaanut nalunaarutigineqassapput. Angajoqqaatut oqartussaassuseq pillugu suliaq eqqartuussivimmi suliaannngortinneqarsimappat tassunga nalunaaruteqartoqassaaq.

Angajoqqaat, ataatsimoorlutik angajoqqaatut oqartussaassuseqartut, inooqatigiinnngitsulli, angajoqqaatut oqartussaassuseqarneq pillugu isumaqatigiinnngippata, eqqartuussivik aalajangiissaaq ataatsimoorluni angajoqqaatut oqartussaassuseqarneq ingerlaannassanersoq, imaluunniit taakku arlaat kisimiillu angajoqqaatut oqartussaassuseqassanersoq. Meeqqamut pitsaanerpaamik meeqqap atugai pillugit angajoqqaat suleqatigiissinnaannngitsut isumaqartoqarpat aatsaat ataatsimoorluni angajoqqaatut oqartussaassuseqarneq eqqartuussivimmit atorunnaarsinneqarsinnaavoq.

Angajoqqaamit angajoqqaatut oqartussaassuseqanngitsumiit noqqaasoqarneratigut eqqartuussivik aalajangersinnaavoq ataatsimoorluni angajoqqaatut oqartussaassuseqartoqassasoq, imaluunniit angajoqqaatut oqartussaassuseqarneq angajoqqaamut tassunga nuuneqassasoq.

Angajoqqaatut oqartussaassuseq Naalagaaffiup Sinniisaanit akuerineqartumik isumaqatigiissuteqarnikkut angajoqqaajunngitsunut allanut nuuneqarsinnaavoq. Angajoqqaatut oqartussaassuseq pillugu suliaq eqqartuussivimmut suliaassanngortinneqarsimappat isumaqatigiissut eqqartuussivimmit akuerineqassaaq.

Angajoqqaat ataatsimoorlutik angajoqqaatut oqartussaassuseqarpata, angajoqqaallu arlaat toquppat, angajoqqaatut oqartussaassuseq angajoqqaap aappaaniiginnassaaq. Toqusoqarnerani meeraq angajoqqaap aappaani najugaqarsimanngippat, toqusoqarneranut atatillugu inuk alla angajoqqaatut oqartussaassuseqarneq tiguniarluni eqqartuussivik qinnuteqarsinnaavoq. Qinnutigisag taamaallaat akuerineqarsinnaavoq angajoqqaatut oqartussaassuseqarneq angajoqqaat aappaaniiginnarnissaanut meeqqamut iluaqutaanerusussaq eqqarsaatigalugu tamanna akerliuppat. Toqusoqarnerani meeraq angajoqqaap aappaani najugaqarpat, taannalu angajoqqaatut oqartussaassuseqartumut toqutitsisuusimalluni, inuk alla angajoqqaatut oqartussaassuseq piumallugu eqqartuussivimmut noqqaasinnaavoq. Qinnutigisag taamaallaat akuerineqarsinnaavoq meeraq eqqarsaatigalugu angajoqqaatut oqartussaassuseqarneq angajoqqaap aappaaniinginnissaanut tamanna aalajangiisuuppat.

Angajoqqaq kisimiilluni angajoqqaatut oqartussaassuseqarpat, taannalu toqulluni, imaluunniit toqusoqarneratigut arlaannaalluunniit angajoqqaatut oqartussaassuseqarnarni, meeqqamut iluaqutaanerusussaq eqqarsaatigalugu kina angajoqqaatut oqartussaassuseqassanersoq eqqartuussivimmi aalajangerneqassaaq. Angajoqqaap aappaa angajoqqaatut oqartussaassuseq qinnutigippagu noqqaaneq akuerineqassaaq, meeqqamut iluaqutaanerusussaq eqqarsaatigalugu tamanna akerliunngippat.

Angajoqqaq kisimiilluni angajoqqaatut oqartussaassuseqarpat, taannalu angajoqqaamut toqutisuusimalluni inuk alla angajoqqaatut oqartussaassuseq piumallugu eqqartuussivimmut noqqaasinnaavoq. Qinnutigisag taamaallaat akuerineqarsinnaavoq meeraq eqqarsaatigalugu angajoqqaatut oqartussaassuseqarneq angajoqqaap aappaaniinginnissaanut tamanna aalajangiisuuppat.

3.3. Meeqqap najugaa siumullu kalerriussineq

Angajoqqaat ataatsimoorlutik angajoqqaatut oqartussaassuseqarpata, meerarli taakku arlaani sumi najugassanersoq isumaqatigiissinnaanngippata, tamanna eqqartuussivimmit aalajangerneqassaaq. Meeraq angajoqqaamini ataatsimi, nunani allani imaluunniit Danmarkimi imaluunniit Savalimmiuni najuaqartumi imaluunniit najugaqarnissamik kissaateqartumi najugaqarnissaa pillugu aalajangiineq eqqartuussivimmit aalajangerneqassaaq.

Angajoqqaq, nunami maani allami imaluunniit nunani allani nammineq imaluunniit meeqqap najugaqarneranik allanngortitserusuttoq nuunnissaq sioqqullugu kingusinnerpaamik sapaatit akunneri arfinillit sioqqullugit tamanna pillugu angajoqqaap aappaa nalunaarfigissavaa. Siumut kalerriinissaq naammassineqanngitsoq pineqaatissiissutaasinnaanngilaq, kisiannili angajoqqaatut oqartussaassuseqarneq il.il. pillugu suliami aalajangiiniarnermi pingaaruteqartutut ilaasinnaalluni.

3.4. Meeqqamik najorteqarneq, nunanut allanut angalanissamut akuersineq, ilisimatinneqarnissamut pisinnaatitaaffik il.il.

Meeqqamik najorteqarneq allatigullu atassuteqarneq

Meeqqap angajoqqaavinut marlunnut atassuteqarnera meeqqap angajoqqaaminik najugaqarfiginngisaminik najorteqarnissamut pisinnaatitaaffeqarneratigut allannortinniarneqanngilaq. Meeqqap angajoqqaaminik najugaqarfiginngisaminik najorteqarnissaanut angajoqqaat ataatsimoorlutik akisussaapput. Angajoqqaat marluullutik taamaattumik meeqqamik najorteqarnermut atatillugu meeqqap angallanneqarneranut ataatsimoorlutik akisussaapput, taamaattumik pisuni aalajangersuinnaq angajoqqaat angalanermut akisussaaffiata agguarnera pillugu piumasaqaatinik eqqartuussivik aalajangersaasinnaalluni.

Angajoqqaat arlaat ataaseq imaluunniit angajoqqaat marluullutik toqusimappata, imaluunniit angajoqqaajusoq ilisimaneqanngippat, noqqaasoqarneratigut meeqqap atssuteqarfigisaanut meeqqap qaninnerpaamik ilaquataanik meeqqamik najorteqarnissamut eqqartuussivik aalajangersaasinnaavoq. Angajoqqaamik, meeqqap najugaqarfiginngisaanik najorteqanngippat imaluunniit killeqarlunnartumik najorteqarpat meeqqap atassuteqarfigisaanut meeqqap qaninnerpaamik ilaquataanik meeqqamik najorteqarnissamut eqqartuussivik aalajangersaasinnaavoq.

Meeraq qitornavissiarneqarsimappat, meeqqap ilaquarpiaasa noqqaasoqarneratigut taakkunannga meeqqamik najorteqarnissaq allatigulluunniit atassuteqarnissaq (assersuutigalugu oqarasuaatikkut oqaloqatigiinnerit il.il., ataanittoq naap.) pisuni immikkuullarissuni eqqartuussivik aalajangersaasinnaavoq, meeraq qitornavissiarneqarsimappat sioqqullugu meeqqamik najorteqarnissap il.il. aalajangersarnissaa pillugu noqqaasumut meeqqamik najorteqarsimappat allatigulluunniit atassuteqarsimappat. Qitornavissiarnermi qitornavissiarneqartup aamma meeqqap taassumaluunniit angajoqqaavisa akornanni qanittumik ilaquatariittoqarpat allatigulluunniit immikkut atassuteqartoqarpat aalajangersagaq immikkut maleruagassaqarpoq, tamatuma kingorna meeqqap ilaquarpiaaniit noqqaasoqarneratigut taakkunannga meeqqamik najorteqarnissamik allatigulluunniit atassuteqarnissamik eqqartuussivik aalajangersaasinnaavoq. Maleruagassaq taanna pingaartumik ”meeqqanut tunissitut” taaneqartartunut tunngatinneqarpoq, immikkoortoq 3.2 naap. Maleruagassaq malillugu ”immikkut pisoqartillugu” taamaallaat meeqqamik najorteqarnissamik aalajangersaasoqarsinnaasoq. Meeqqamik najorteqarnissaq pillugu aalajangersaanerup saniatigut meeqqamut pitsaanerpaassaaq (takuuk immikkortoq 3.1), tamatuma pingaartumik kingunerisaanik, nalinginnaasumik meeqqamik najorteqarneq il.il. taamaallaat aalajangersaasoqarsinnaalluni, meeraq qinnuteqartorlu imminnut atassuteqarsimappata – qitornavissiarneq sioqqullugu imaluunniit kingorna – atassuteqarnerlu taanna unitsinneqarsimalluni, aamma atassuteqarnerup ingerlatiinnarnissaa meeqqamut pingaaruteqarluni. Meeqqap ilaquataanik amerlanernik najorteqarnissaanut aalajangersagaq akornusiinngilaq, eqqarsaatigineqassaarli saniatigut meeqqamik najorteqarnikkut aaqqiussuusinernik amerlanernik peqarnissaq meeqqamut iluaqutaanerpaanersoq.

Meeqqamik najorteqarnerup annertussusia ingerlanneqarneralu pillugu isumaqatigiinngitsoqarpat, noqqaasoqarneratigut tamanna pillugu eqqartuussivik aalajangiisinnaavoq tassungalugu atatillugu aalajangersakkat pisariaqartinneqartut aalajangersarlugit. Meeqqap atugaanik aalajangersimasumik nalilersuineq aallaavigalugu meeqqamik najorteqarneq aalajangersarneqassaaq, tassunga ilanngullugit meeqqap ukiui ineriartorneralu, meeqqap najorteqarnermut isumaa kiisalu najorteqarfiusut angajoqqaat aamma meeqqap manna tikillugu atassuteqarnerat. Sapaatip

akunnerata naaneranut tunngatillugu, ulluinnarnilu meeqqamik najorteqarnerit, sulinnigiffeqarnermi meeqqamik najorteqarnek kiisalu juullimut ukiortaamullu atatillugu meeqqamik najorteqarnerit kiisalu kulturikkut upperisarsiornikkullu pisunut allanut atatillugu aalajangersaasoqarrtarput. Meeqqamik najorteqarnermi atugassanik aalajangersaasoqarsinnaavoq, tassunga ilanngullugu tamanna nakkutigineqassanersoq assigisaaluunniit.

Meeqqamik najorteqarnerup aalajangersarnissaa eqqartuussiviup itigartissinnaavaa aamma meeqqamik najorteqarnek pillugu aalajangiineq aalajangiineq isumaqatigiissulluunniit allannortissinnaallugu atorunnaarsissinnaallugulu. Meeqqamik najorteqarnissamik itigartitsineq nalinginnaasumik pisarpoq angajoqqaat najorteqarfiusut meeqqamik persuttaasimappata imaluunniit allatigut killissamik qaangiisimappata, angajoqqaat akornanni annertuumik akerleriiffiusumik, imaluunniit angajoqqaat najorteqarfiusut atonerluinermik ajornartorsiuteqarpata imaluunniit tarnikkut ajornartorsiuteqarpata. Pingaartumik meeqqamik najorteqarnissamik itigartitsineq imaluunniit atorunnaarsitsineq pillugu aalajangiinernut atugassamik meeqqamik paasisimasaqartumik misissuisoqartitsinissaq tulluarsinnaavoq.

Immikkut pisuni meeqqamik allatigut atassuteqarnissaq pillugu eqqartuussivik aalajangersaasinnaavoq soorlu oqarasuaatikkut oqaloqatigiinneq, allaqatigiinneq, elektronikkikkut allaqatigiinneq, assilissat assigisaaluunniit.

Isumaginninnermi inatsisini tamanna pillugu maleruagassat malillugit meeraq angerlarsimaffiup avataanut inissinneqarsimappat peqqussummi meeqqamik najorteqarnek allatigullu atassuteqarnek pillugu aalajangersakkat atorneqassanngillat.

Nunanut allanut angalanissamut akuersineq

Ataatsimoortumik angajoqqaatut oqartussaassuseqartut angajoqqaat akornanni angajoqqaatut oqartussaassuseqarnek pillugu isumaqatigiinngitsoqarpata angajoqqaap aappaata meeqqap nunanut allanut, Danmarkimut imaluunniit Savalimmiunut piffissami sivikitsumi ilagisinnaagaa pillugu eqqartuussivik aalajangiisinnaavoq.

Meeraq pillugu ilisimatitsineq il.il.

Angajoqqaq, meeqqamut angajoqqaatut oqartussaassuseqanngitsoq, meeqqap atugai pillugit atuarfimmiit, meeqquerivinniit, isumaginnittoqarfimmiit peqqinnissaqarfimmiillu kiisalu napparsimavinnit namminersortunit, nakorsanit kigutillu nakorsaannit namminersortunit ilisimatinneqarnissamut pisinnaatitaaffeqarput. Angajoqqaq taanna aamma meeqqap atugai pillugit allagaatinik paasitinneqarnissamut pisinnaatitaaffeqarpoq, taakku atuarfimmi meeqquerivimmilu nassaassaappata. Paasitinneqarnissamut pisinnaatitaaffeqartoqaraluarpalluunniit paasissutissat angajoqqaatut oqartussaassusermut tunngasut isertuussat tunniunneqaqqusaanngillat.

Pisortat suliffiutaat il.il. pineqartut meeqqap atugai pillugit paasissutissanik allagaatinillu tunniussinissamut itigartitsisinnaapput, tamanna meeqqamut ajoqutaasinnaasoq isumaqarfigineqarpata. Tamanna pillugu aalajangiineq Kalaallit Nunaanni Isumaginninnermut Naammagittaalliiuteqartarfimmut nammagittaalliuutigineqarsinnaavoq.

Naalagaaffiup Sinniisuata immikkut pisuni angajoqqaatut oqartussaassuseqartumiit imaluunniit pisortat suliffeqarfiutaanit il.il. pineqartuniit noqqaasoqarneratigut meeraq pillugu allagaatit pillugit ilisimatinneqarnissamut tunniussinissamullu periarfissaqarnermik angajoqqaq arsaarsinnaavaa.

3.5. Aalajangiigallarnerit

Angajoqqaatut oqartussaassuseqarneq pillugu suliap ingerlanerani noqqaasoqarneratigut angajoqqaatut oqartussaassuseqarnermik kina tunigallarneqarsinnaanersoq eqqartuussivik aalajangersinnaavoq, imaluunniit angajoqqaat arlaanni sumi meeraq utaqqiisaasumik najugaqarsinnaasoq. Meeqqap najugaa pillugu suliap ingerlanerani noqqaasoqarneratigut angajoqqaat arlaanni sumi meeraq utaqqiisaasumik najugaqarsinnaasoq eqqartuussivik aalajangiisinaavoq. Kiisalu angajoqqaatut oqartussaassuseqarneq, meeqqap najugaa, meeqqamik najorteqarneq allatigulluunniit atassuteqarneq pillugu suliap ingerlanerani meeqqamik najorteqarneq allatigulluunniit atassuteqarneq pillugu eqqartuussivik utaqqiisaasumik aalajangiisinaavoq. Utaqqiisaasumik aalajangiineq atuuppoq inaarutaasumik isumaqatigiissuteqarnissap imaluunniit aalajangiinerup naammassineqarnissaata tungaanut.

Angajoqqaat ataatsimoorlutik angajoqqaatut oqartussaassuseqarpata, aamma arlaata meeraq nunamit annissinnaappagu taamaalillunilu angajoqqaatut oqartussaassuseqarneq pillugu aalajangiinissaq sioqqullugu, isumaginninnermut, meeqqanut akuliutitaanermullu ministerip ministerilluunniit piginnaatitaata, angajoqqaat aappaat utaqqiisaasumik angajoqqaatut kisimiilluni oqartussaassuseqartussanngortissinnaavaa.

Angajoqqaatut oqartussaassuseqartoq imaluunniit oqartussaassuseqartut marluullutik meeqqap inuttut atugai pillugit aalajangiinissamut akornuserneqarsimappata eqqartuussivik aalajangissaaq kina angajoqqaatut oqartussaassuseqassanersoq, akornutaasup atuunnerani.

3.6. Sulianik suliarinnineq

Angajoqqaatut oqartussaassuseqarneq, meeqqap najugaa imaluunniit meeqqamik najorteqarneq pillugu isumaqatigiinngitsoqartillugu eqqartuussivik aamma Naalagaaffiup Sinnissua angajoqqaanut meeqqanut meeqqanik paasisimalimmik siunnersuisoqarnissaa imaluunniit akerleriinnermi isumaqatigiissitsiniartoqarnissaanik neqerooruteqarsinnaapput, aamma meeqqanik paasisimasallit misissuinerannik il.il. aallartitsisinnaallutik.

Angajoqqaatut oqartussaassuseqarneq, meeqqap najugaa imaluunniit meeqqamik najorteqarneq pillugu suliap ingerlanerani meeraq ilanngutitinneqassaaq, taamaalilluni taassuma isiginninnera immaqalu isumaa oqaatigineqarluni. Tamanna pisinnaavoq meeqqamik oqaloqateqarnikkut, meeqqanik paasisimasaqartut misissuineratigut allatigulluunniit meeqqap isiginninneranik erseqqissaasumik. Tamanna atuutinngilaq, tamanna meeqqamut ajoqutaasinnaasutut isumaqarfigneqarpat, imaluunniit suliap qanoq ittuunera malillugu pisariaqanngitsutut isigineqarpat.

Meeqqamik najorteqarnermut atatillugu meeqqap angallanneqarnissaanut angajoqqaat ataatsimoorlutik akisussaanagerat pillugu suliat suliarinerinut atugassamik akileraaruseriffimmi peqataasoq pillugu aningaasatigut paasisutissanut pisariaqartinneqartunut iserluni pissarsinissamut eqqartuussivik pisinnaatinneqarpoq. Aalajangersagarli taanna maannakkut atuutilersinneqarsinnaanngilaq, tassa taamatut iserfissamik pilersitsinissaq suli periarfissaanngimmat.

Angajoqqaatut oqartussaassuseqarnerup, meeqqap najugaanik imaluunnit meeqqamik najorteqarnerup allatigulluunniit atassuteqarnerup allanngortinnissaa pillugu noqqaassut tunngaviatigut itigartinneqarsinnaavoq, pissutsit malunnaatilimmik allanngorsimangippata. Tamatumani siunertaq tassaavoq angajoqqaatut oqartussaassuseqarneq il.il. pillugit suliat ingerlaartuarnissaasa pinngitsoortinnissaat, tassa suliani taamatut ittuni ilanngunneqartuarnermikkut tamanna meeqqamut ajoqusiisinnaammat.

Angajoqqaatut oqartussaassuseqarneq pillugu isumaqatigiissutit pillugit Naalagaaffiup Sinniisuata aalajangiineri isumaginninnermut, meeqqanut akuliutitaanernermullu ministerimut naammagittaalliutigineqarsinnaapput. Ministeri ilaatigut angajoqqaatut oqartussaassuseqarneq pillugu sulianik Naalagaaffiup Sinniisuata suliarinninnera pillugu maleruagassanik aalajangersaasinnaavoq.

3.7. Sulinissaq pillugu isumaqatigiissutit

Sulinissaq pillugu isumaqatigiissutini maleruagassat angajoqqaat akisussaananerannik peqqussummiittut namminersorsinnaanermik peqqussummi maleruagassanut naapertuupput, imm. 2.5 naap.

3.8. Nunani tamalaani isumaqatigiissutit aamma nunat tamalaat piginnaatitaaneri

Angajoqqaatut oqartussaassuseqarneq, najugaqarneq, meeqqamik najorteqarneq allatigullu atassuteqarneq pillugu danskit inatsisaasa aamma nunat allamiut inatsisaasa akornanni pissutsit pillugit naalagaaffinnik allanik naalakkersuisut isumaqatigiissuteqarsinnaapput. Aammattaaq isumaginninnermut, meeqqanut akuliutitaanernermullu ministeri angajoqqaatut oqartussaassuseqarneq, najugaqarneq, meeqqamik najorteqarneq allatigullu atassuteqarneq pillugu danskit aamma nunani avannarlerni nunani allani maleruagassat akornanni pissutsit pillugit maleruagassanik aalajangersaasinnaalluni.

Angajoqqaat akisussaananerannut aamma meeqqanik illersuinnermut iliuusissanut tunngasutigut piginnaatitsineq, inatsisinik toqqaaneq, akuersineq, naammassinninneq aamma suleqatigiinneq pillugu Haagimi isumaqatigisummut 19. oktober 1996-imeersumut ilaasunut inatsimmi matumani sulianik suliarinninneq pillugu ministeri aamma maleruagassanik aalajangersaasinnaavoq¹.

Angajoqqaatut oqartussaassuseqarneq pillugu sulianik suliarinninnissamut Naalagaaffiup Sinniisua nunani tamalaani piginnaatitaavoq, Kalaallit Nunaanni eqqartuussisarnermik inatsimmi § 283, imm. 2-mi piumasaaqatit naammassineqarsimappata. Inatsisissatut siunnersuummut innersuussisoqarpoq.

3.9. Atuutilersinnera il.il.

Angajoqqaat akisussaananerannut inatsisip Kalaallit Nunaannut atuutilersinnera pillugu peqqusut Inatsisissatut siunnersuummut ulloq 1. januar 2016-mi atuutilersinneqartussatut siunnersuutigineqartumut atalluinnarpoq. Taamaattorli isumaginninnermut, meeqqanut akuliutitaanernermullu ministeri qarasaasiakkut pissarsisinnaanermut maleruagassat atuutilersinnissaannut piffissamik aalajangiissaaq.

¹ Immikkut naalisagaq takujuk.

Peqqussut meeqqanut taanna sioqqullugu inunnorsimasunut aamma atuuppoq, aamma angajoqqaatut oqartussaassuseqarneq aamma meeqqamik najorteqarneq pillugu suliani ingerlanneqartuni atorneqassalluni.

Angajoqqaat akisussaanerannut peqqussummi angajoqqaatut oqartussaassuseq pillugu aalajangersakkat marluk taamaattoq meeqqanut, ulloq 1. januar 2016-mi kingusinnerusukkuulluunniit inunnorsimasunut taamaallaat atorput. Tassani pineqarput ataatsimoortumik angajoqqaatut oqartussaassuseqarnermik ingerlaannartumik pilersitsineq, meeqqap inunnornera sioqqullugu qaammatini kingullerni qulini katissimasimappata, imaluunniit akuersineq imaluunniit eqqartuussut malillugu angut ataaseq meeqqamut ataataasutut isigineqarpat, aamma angajoqqaat meeqqap inunnornissaa kingusinnerpaamik qaammatit qulit iluanni angajoqqaat inuit allattorsimaffiat naapertorlugu ataatsimoorlutik najugaqarpata imaluunniit najugaqarsimappata.

4. Tusarniaaneq

Inatsisissamat siunnersuummut innersuussisoqarpoq.